



14-25-4-5

Al meu Do Deu
meu Joan de Jesus m^a
pocio Geral de arme
e tanto de bello e de amora
com de Italia tanto de Roma
e de Lombardia del
Gualter

Handwritten text, possibly a signature or date, located in the upper right quadrant of the page.

14.25.H.5

REGVLA

3

PRIMITIVA

ET CONSTITVTIONES

FRATRVM DISCALCEATORVM

CONGREGATIONIS

S. ELIAE

ORDINIS B. VIRGINIS MARIAE

DE MONTE CARMELO.

Sanctae Mariae de Scala



Ex Legato

Musini. Locum.

ROMAE. E. Typographia Gulielmi Facciotti
M L C X I.

SVPERIORVM PERMISSV.

Imprimatur. Cęsar Fidelis Viceſgerens.

Imprimatur. Fr. Damianus à Fonſeca Mag. &
ſocius Reuerendiſs. P. F. Luđouici Yſtella
Sacri, & Apoſtolici Palatij Maģiſtri, Ordinis
Prędicatorum...

3
4
REGVLA PRIMITIVA ORD.

**Beatissimę Virginis Marię de
Monte Carmelo**

A B. ALBERTO PATRIARCHA
Hierosolymitano tradita,

ET AB INNOCENTIO IIII.
confirmata .



ALBERTVS, Dei gratia
Hierosolymitanę Ecclesię
vocatus Patriarcha, dile-
ctis filijs Brocardo, & cæ-
teris Fratribus eremitis,
qui sub eius obedientia,
iuxta fontem Elię, in mon-
te Carmeli morantur ; in Domino salutem ,
& sancti Spiritus benedictionem. Multifarię,
multisque modis sancti Patres instituerunt,
qualiter quisque in quocumque ordine fue-
rit, vel quemcumque modum religiosę vitę
elegerit, in obsequio Iesu Christi vivere de-
beat, & eidem fideliter de corde puro, & con-
scientia bona deseruire . Verum , quia re-
quiritis a nobis, vt iuxta propositum vestrũ
tradamus vobis vitę formulam, quam tene-
re in posterum debeatis :

A B DE I

⁴
DE PRIORE HABENDO
& tribus sibi promittendis.



ILLUD in primis statuimus, vt vnum ex vobis habeatis Priorem, qui ex vnanimi, omniumque assensu, vel maioris, & sanioris partis, ad hoc officium eligatur, cui obedientiam promittat quilibet aliorum, & promissam studeat operis veritate seruare, cum castitate, & abdicatione proprietatis.

De receptione locorum.

LOca autem habere poteritis in eremis, vel vbi donata vobis fuerint, ad vestre religionis obseruantiam apta, & commoda, secundum quod Priori, & Fratribus videbitur expedire.

De Cellis Fratrum.

Praterea, iuxta situm loci, quem inhabitare proposueritis, singuli vestrum sin-

S

gulas habeant cellulas separatas, sicut per dispositionem Prioris ipsius, & de assensu aliorum Fratrum, vel sanioris partis, eadem cellulae cuique fuerint assignatae.

S

De communi refectiōe.

ITa tamen, quod in communi refectorio, ea, quae vobis erogata fuerint, communiter aliquam lectionem sacrae Scripturae audiendo, ubi commodè poterit observari, sumatis. Nec liceat alicui Fratrum, nisi de licentia Prioris, qui pro tempore fuerit, deputatum sibi mutare locum, vel cum alio permutare. Cellula Prioris sit iuxta introitum loci, ut venientibus ad eundem locum, primus occurrat, & de arbitrio, & dispositione ipsius, postmodum, quae agenda sunt, cuncta procedant. Maneant singuli in cellulis suis, vel iuxta eas, die, ac nocte in lege Domini meditantes, & in orationibus vigilantes, nisi alijs iustis occasionibus occupentur.

De Horis Canonicis.

HI, qui Horas Canonicas cum Clericis dicere norunt, eas dicant, secundum constitutionem Sanctorum Patrum, & Ecclesiae approbatam consuetudinem.

Qui eas non nouerint ; viginti quinque vicibus Pater noster dicant in nocturnis vigilijs , exceptis Dominicis , & solemnibus diebus , in quorum vigilijs , prædictum numerum statuimus duplicari , vt dicatur Pater noster vicibus quinquaginta . Septies autem eadem dicatur oratio in Laudibus Matutinis . In alijs quoque Horis , septies similiter eadem dicatur oratio figillatim , præter officia vespertina , in quibus ipsam quindecies dicere debeatis .

De non habendo proprium .

Nullus Fratrum sibi aliquid proprium esse dicat : sed sint vobis omnia communia , & distribuatur vnicuique per manum Prioris , vel per Fratrem ab eodem ad idem officium deputatum , prout cuique opus erit , inspectis ætatibus , & necessitatibus singulorum .

Quod licet habere in communi .

ASinos autem , siue mulos , prout vestra expostularit necessitas , vobis habere liceat , & aliquot animalium , siue volatilium ad nutrimentum .

7 6

De Oratorio, & cultu diuino.

O Ratorium, prout commodius fieri poterit, construatur in medio cellularum, vbi manè per singulos dies, ad audienda Missarum solennia conuenire debeatis, vbi hoc commodè fieri potest.

De Capitulo, & correctione Fratrum.

D Ominicis quoque diebus, vel alijs, vbi opus fuerit, de custodia ordinis, & animarum salute tractetis: vbi etiam excessus, & culpæ Fratrum, si quæ in aliquo deprehensæ fuerint, charitate media corrigantur.

De Ieiunio Fratrum.

I eiunium singulis diebus, exceptis Dominicis obseruetis, à festo Exaltationis sanctæ Crucis, vsque ad diem Dominicæ Resurrectionis, nisi infirmitas, vel debilitas corporis, aut alia iusta causa ieiunium solui suadeat, quia necessitas non habet legem.

De abstinentia carniuum.

Ab esu carniuum abstineatis, nisi pro infirmitatis

tatis , vel debilitatis remedio sumantur .
 Et quia vos oportet frequentius mendicare itinerantes , nè sitis hospitibus onerosi , extra domos vestras sumere poteritis pulmenta cocta cum carnibus : sed & carnibus supra mare vesci licebit .

Exhortationes.

Quia verò tentatio est vita hominis super terram, & qui piè volunt vivere in Christo, persecutionem patiuntur: aduersarius quoque vester diabolus, tanquã leo rugiens, circuit quarens quem deuoret, omni sollicitudine studeatis indui armatura Dei, vt possitis stare aduersus insidias inimici. Accingendi sunt lumbi vestri cingulo castitatis, muniendum est pectus cogitationibus sanctis. Scriptum est enim: Cogitatio sancta seruabit te. Induenda est lorica iustitiæ, vt Dominum Deum vestrum, ex toto corde vestro, & ex tota anima vestra, & tota virtute diligatis, & proximum vestrum tanquam vosiplos. Sumendum est in omnibus scutum Fidei, in quo possitis omnia tela nequissimi ignea extinguere. Sine Fide enim impossibile est placere Deo. Galea quoque salutis capiti imponenda est, vt de solo Salvatore speretis salutem, qui saluum facit populum suum a peccatis eorum.

rum . Gladius autem spiritus, quod est verbum Dei, abundanter habitet in ore, & in cordibus vestris : & quaecumque vobis agenda sunt, in verbo Domini fiant . Faciendum est vobis aliquid operis, vt semper diabolus inueniat vos occupatos, nè ex ociositate vestra, aliquem intrandi aditum ad animas vestras valeat inuenire . Habetis in hoc, beati Pauli Apostoli magisterium pariter, & exemplum, in cuius ore Christus loquebatur, qui positus est à Deo prædicator, & Doctor gentium, in fide, & veritate, quem si secuti fueritis, non poteritis oberrare . In labore (inquit) & fatigatione fuimus inter vos, nocte, & die operantes, ne quem vestrum grauaremus : non quasi nos non haberemus potestatem, sed vt nosmetipsos formam daremus vobis, ad imitandum nos . Nam cum essemus apud vos, hoc denunciabamus vobis : quoniam, si quis non vult operari, non manducet . Audiuius enim, inter vos quosdam ambulantes inquietè, nihil operantes . His autem, qui huiusmodi sunt, denunciamus, & obsecramus in Domino Iesu Christo, vt cum silentio operantes, panem suum manducent . Hæc via sancta, & bona, ambulate in ea .

De Silentio .

Commendat autem Apostolus silentium, cum in eo præcipit operandum . Et quemadmodum Propheta testatur : Cultus iustitiæ silentium est . Et rursus : In silentio, & spe erit fortitudo vestra . Ideoque statui-
mus, vt dicto Completorio, silentium teneatis vsque ad Primam dictam sequentis diei . Alio verò tempore, licet silentij non habeatur obseruantia tanta , diligentius tamen, à multiloquio caueatur . Quoniam , sicut scriptum est , & non minus experientia docet : In multiloquio peccatum non deerit . Et qui inconsideratus est ad loquendum , sentiet mala . Item qui multis vititur verbis, lædit animam suam . Et Dominus dicit in Euangelio : De omni verbo otioso, quod loquuti fuerint homines, reddent de eo rationem in die Iudicij . Faciat ergo vnusquisque stateram verbis suis , & frænos rectos ori suo, ne fortè labatur , & cadat in lingua sua , & insanabilis sit casus eius ad mortem , custodiens cum Propheta vias suas , vt non delinquat in lingua sua , & silentium (in quo cultus iustitiæ est) diligenter , & cautè studeat obseruare .

Exbor-

Exhortatio Prioris ad humilitatem.

TV autem Frater Brocarde, & quicumque post te institutus fuerit Prior, illud semper habeatis in mente, & obseruetis in opere, quod Dominus ait in Euangelio: Quicumque voluerit inter vos maior fieri, erit minister vester: & quicumque voluerit inter vos primus esse, erit vester seruus.

Exhortatio Fratrum, ut Priorem suum honorent.

VOs quoque cæteri Fratres, Priorem vestrum honorate humiliter, Christum potius cogitantes, quàm ipsum, qui posuit ipsum super capita vestra. Et Ecclesiarum Præpositis ait: Qui vos audit, me audit; & qui vos spernit, me spernit: vt non veniatis in iudicium de contemptu, sed de obedientia mereamini vitæ æternæ mercedem. Hæc breuiter scripsimus vobis: conuersationis vestræ formulam statuentes, secūdum quam viuere debeatis. Si quis autem superrogauerit, ipse Dominus, cū redierit, reddet ei. Vratur tamen discretionē, quæ virtutum est moderatrix.

F I N I S.

Constitutiones Fratrum Discalceatorum
Congregationis Sancti Elię Ordinis
B. Virg. Marię de Monte
Carmelo.

P R O L O G V S.

De Instituti nostri ratione.



QUANTUM VNI-
uersi, quos æternæ
felicitatis tenet de-
siderium, in opera
charitatis incum-
bunt; quia tamen
charitatis actus du-
plex est, amor nimi-
rum Dei, ac proxi-
mi; sancta Mater

Ecclesia filiorum suorum studia in duas clas-
ses discreuit; è quibus vna Deo soli vacaret,
altera proximo propter Deum inserviret.

2 Nostræ verò Religioni duplex bonum
hoc, ordine servato, diuinitus collatum
est, vt potior eius pars esset rerum diuinarum
contemplatio, & amor; posterior autem es-
set actio, ea præsertim, quæ ad proximorum
salutem pertinet.

3 Quam vitam rationem ex Dei, & proxi-
morum

morum amore compositam, Patres nostri Elias, & Eliseus, non scripto, sed rebus gestis instituerunt, & posteris obseruandam tradiderunt.

4. Quam etiam, apparente Euangelij luce, tantorum Patrum filij in oriente imitati sunt; parique animi magnitudine in occidente clarissimi sancti Angelus, Albertus, Petrus Thomas, Andreas Fesulanus, alijque multi exercuerunt.

5. Et quamuis ad eam vitæ rationem explendam, Regula nostra quid fieri oporteat aptè tradiderit; quia tamen brevis admodum est, & ea expressè tradi non potuit, quod ad euentus singulos, & tates singule, moresque requirunt; nonnullas Constitutiones multis experimentis probatas, Regula ipsi consentaneas, in Generalibus Capitulis Religio nostra sancit, quæ in tres partes diuiduntur.

In prima quippè agitur de actibus ad mores attinentibus.

In secunda de diuersorum Conuentuum institutione.

In tertia de gubernatione, quæ prædicta cuncta tuetur.

PARS PRIMA

CONSTITVTIONVM

De Communioribus totius Congregationis actibus ad mores
attinentibus.

Cap. I. De Obedientia.



Optus monasticæ disciplinæ basis obediētia est, qua Religiosus in statu proprio constituitur, & ad christianam perfectionem comparandam promouetur.

Quapropter Fratres nostri, vt obedientiæ voto, trium solemnium, præstantissimo perfectè satisfaciant, partes obseruantix totius, quæ obedientix amplitudine comprehenditur explorent, ac obseruent.

3 Huiusmodi vero partes sunt, Regula, Constitutiones, Ordinarium, Manuale, Instructiones, & viuz vocis quotidiana mandata, quorum discrimina, & obligandi vim à veris Religiosis ignorari non decet.

4 Regula quippe, exceptis votis, & officio diuino ibi contentis, ad culpam tantum

vc.

venialem obligat. Constitutiones autem, Ordinarium, Manuale, Instructiones, & viuz vocis mandata non ad culpam, sed ad pœnam impositam, vel à Superiore imponendam obligant, nisi contemptus adsit, aut contrarium eius, quod statuitur ex natura sua, aut aliunde culpa sit.

5 Sola trium votorum solemnium, & quarti de non ambiendo grauis transgressio, & officij diuini omissio mortalis est: obedientiam autem, tunc solummodo quis grauiter transgreditur, cum ea, quæ per scriptum sub formali præcepto, vel censura iubentur, non obseruat.

6 At Religiosi veri, licet hæc obligationis discrimina, explorata habere debeant; sic tamen erga Superiores Christi vicem gerentes, affici debent, vt quidquid ab eis, seu scripto, seu verbotenus iniungitur, ea mente perficiant, quasi omissio, vel repugnantia mortalis esset.

7 Quam obedientiæ perfectionem vt acquirant, præcipimus, vt ad communes actus signo conuocati, sedulo conueniant, & officia quauis per communem tabulam eis iniuncta perficiant, litterasque sine Superioris eas partim saltem lecturi concessu, nec mittant, neque recipiant.

8 Præcipimus deinde, vt nihil quamuis minimum, etiam ad corporis refectionem, cuius-

cuiusmodi est aquæ potus, præter communes horas; vel ad animæ alimoniam, cuiusmodi est Eucharistiæ Sacramentum, præter designatos cunctis Fratribus dies, sine Superioris venia sumant. Quod & in rebus ad vestitum, & libros, totamque claustrî disciplinam pertinentibus obseruari præcipimus, vt satisfiat Regulæ dicenti: Et de Superioris arbitrio postmodû, quæ agenda sunt, cuncta procedât.

Cap. II. De Castitate.

1 **B**eatissimæ Virginis filios singulari decet castitate nitere; quæ licet in corde sedem habeat, externam sensuum custodiam quoque requirit.

2 Quamobrem Fratres nostri, & motus internos, & sensus externos, oculos præsertim, ita moderentur, vt nihil non castum patiantur, aut præ se ferant.

3 Familiaritatem mulierum etiam pudicarum vitent: cûq; Dei oculis omnia nuda, & aperta sint, eas alloquuturi ita modestè se gerant, ac si in Ecclesia ipsa cum populi frequentia versarentur.

4 Vt autem ab omni specie mali huius abstineant, præcipimus vt foras prodeuntes, bini, ac indiuidui procedât, ne aliquod ex se paratione periculum immineat.

5 Cum vero mulieres foris alloquuntur, ostium

ostium loci pateat, vt socius alter, si velit, alterum facile videre possit.

6 Si quis autem (quod Deus auertat) quipiam parum castum commiserit, si occultum sit, & spes emendationis adsit, statim socius illum secreto corripiat.

7 Si tamen facta correptione videat se non profuisse, aut ante factam, re prudenter expensa, non credat se profuturum; reuelet culpam alicui, quem profuturum existimet, quo deficiente, reuelet Superiori pio, ac prudenti, cuius consilia efficaciora sunt.

8 Si tamen sæpe, aut semel tantum labentem, sed vno lapsu bono Religionis nomini nocentem videt, Superiori tanquam patri, aut pro qualitate culpe, quasi iudici deferat, vt subditi lapsi salutem querat, & bonum Religionis nomén sublatum restituat.

Cap. III. De Paupertate.

1 **V**T Redemptorem nostrum, qui cum esset diues, egenus propter nos factus est, Fratres nostri perfectius imitentur, præcipimus, vt bona omnia sint omnibus communia, & sub nullo prætextu rem aliquam etiam minimam, tãquam propriam vllus possideat, vel suo tantum vsui domi, forisue referuet.

2 Domus nostræ, quæ missionibus destinatæ non sunt, in vrbibus, vel oppidis ma-

B

gnis

gnis sitæ, frui nequeant ullis proprijs redditibus nisi in casibus §. 4. ponendis. Nomine autem reddituum intelligimus etiam prædia, siue possessiones frugiferas, & quodlibet aliud stabile etiam frugiferum, præter hertos competentes, aut stabile aliud, sine cuius possessione Fratres in Conuentibus, quiete, & sine subiectione viuere non possunt; aut stabilia alia, quæ non sint redditibus percipiendis destinata, quamuis nonnihil emolumenti inde proueniat: quæ omnia à Definitorio prouinciali iudicentur.

3 Si in oppidis paruis, vel extra vrbes, & oppida Conuentus nostri fuerint, Præpositus, ac Definidores generales, re maturè considerata, solius necessitatis rationem habentes, concedere poterunt, vt aliquis ex ijs Conuentibus redditus habeat.

4 Conuentus nostri omnes pro Missis, alijsue functionibus pijs annuos redditus moderatæ quantitatis recipere possint: qua in re si dubium oriatur à Definitorio prouinciali decidetur. Præcipimusque vt in publico instrumento fiat pactum expressum, vt si fructus integrè non percipiantur sine culpa ex parte nostra, pro rata solummodo Missas dicere teneamur, & ad nihilum, si nihil percipiatur. Quod verò ad quotidianarum Missarum numerum attinet, non recipiant plures eleemosynas quàm eas, quibus breui satisfieri possit, nec eam, quæ

quæ cito consumatur sub onere perenni relicto ; aliàs pactio quævis super hoc nulla sit.

5 Si verò bona immobilia, census, aut redditus alicui Conuentui quouis iure obuenerint, Prior nec vendere, nec alienare valeat, nisi de cōsensu Definitorij prouincialis, quod iuxta Summ. Pontif. concessionēs, & priuilegia ea bona distribuere, vel alicui loco tribuere poterit, prout ei in Domino videbitur expedire.

6 Ne Fratres nostri pia opera contemnere videantur, quasi conscientia coacti, ratione hereditarij iuris legatorum, aut rerum testamento, aut quouis alio modo relictarū, de consensu Capituli conuentualis litem mouere possint, quod per secularem procuratorem semper fiat. Statim verò Prouincialem, certiores faciant, cuius mandato litem cœptam prosequantur, vel ab ea abstineant. Prouincialis autem in proximo Definitorio prouinciali rem totam pertractet, ac iuxta ipsius Definitorij decretum vltius in lite procedatur, vel ab ea desistatur. Similiter quando ab alijs lis mouetur, ius Religionis, vt obligationi satisfaciant, Fratres nostri modestè poterunt defendere.

7 Bona omnia Conuentus in communes officinas reponantur, & asseruentur : & inde ministri à Superiore designati inspectis ætatibus, & necessitatibus singulorum, ac de

Superioris ipsius venia, vnicuique necessaria provideant: sine Superioris autem venia nullus quippiam recipiat, vel referuet, aut vlli donet, vel cum seculari, aut etiam Religioso permutet.

8 Omnia ex officinis deprompta, & Fratrum vsui semel attributa, Superior ad nutum auferre, ac permutare valebit; qui superuacanea quæque, & elaborata in Monasterio pauperum esse non permittat; eiusmodi quippè omnia præsertim aurea, argentea, vel ex materia qualibet pretiosa, etiam deuotionis gratia Religiosis omnibus prohibemus: Fratres verò, simul ac rerum vsu non eguerint, in communes officinas reponent. Qui autem, hac in re culpam commiserit pœnam medietatis feret.

9 Singulorum Fratrum cellæ sic instruantur; lectus fiet ex corticibus arborum, seu ex tabula vna, vel pluribus, latus circiter quatuor, altus duos fere palmos, qui duas vel tres tantum lodes nullo artificiali colore tinctas, & puluinem laneum lana plenum, habebit. Infirmis verò permittitur aliquod stramentum. Mensa sit inelaborata, & apta libris necessarijs sustinendis, quibus si forte non sufficiat, fulcimentum aliquod ligneum impositum concedatur; sedile verò sit ligneum, aut paleis, vel herbis textum. Potissima vero supellex sit Crux, & aliquæ Imagines ex char

ta

ta, ad excitandum affectum opportune.

10 Quia verò tam modica supellex, & nullius propria, custodia vlla inter domesticos, nisi ab extraneis non eger; arcas, & capsas omnes obseratas, & cellarum clauēs Fratribus prohibemus. At commune aliquod instrumentum, quo cellæ secularibus clausæ à Fratribus communiter claudi, aperiri que possint, in morem volumus induci, vbi opus esse Prouinciali videbitur.

11 Præpositus autē, Definitorēs generales, Prouinciales, Procurator generalis ad suarū functionum scripta, singulorum Conuentuum Procuratores ad communium expensarum, nummos seruandos, paruam capsam obseratam, Priores vero in arca trium clauium, conditam arculam ad officij sui litteras, epistolæque secreto dignas reponendas habere possint. Alij vero Religiosi, sub nullo prætextu etiam pio, pecuniam vllā, putā vt eam restituant, aut in eleemosynas distribuunt, apud se retinere possint, sed eam in arca trium clauium asseruandam deponant, vel Priori seruandam tradant, res item alias sibi creditas in communibus officinis custodiendas deponant.

12 Nullus, etiam charitatis obtentu eleemosynam alijs, etsi parentibus, aut germanis Fratribus erogandam vltra vnum aureum sine venia Definitorij Prouincialis postulet.

ad eam vero quantitatem Prior Conuentus veniam poterit impertire . Hac vero Constitutione eleemosynas à cōcionatoribus è pul-pito postulari solitas non prohibemus , dummodo pro necessitatibus nostrorum Conuentuum nihil postulent .

13 Si quis , (quod nunquam fore in Domino speramus) de proprietatis culpa conuincatur , per annos duos iuxta Concilij Tridentini decretum , vocis actiua , ac passiva eo ipso priuationem incurrat ; ac præterea in carcerem per duos menses sine vlla dispensatione includatur .

Cap. III. De Oratione mentali .

1 **C**um instituti nostri potior pars sit contemplatio , ad quam per continuam Dei præsentiam , & statas , quotidianasq. orationis horas tendendum est ; decernimus , vt singulis diebus , ante , vel post Primam , per vnā horam ; & pariter ante , vel post Completorium (pro temporum discrimine , vt in ordinario traditur) per vnā similiter horam , fiat mentalis oratio .

2 Fiet autem vulgò communis oratio in Choro , vel in aīo ad quietem commodiore loco , qui nec obscurus , nec nimia luce illustratus sit ; in quem postquam Fratres conuerint , præmissa Antiphona Veni sancte Spiritus

ritus, & oratione, Deus qui corda fidelium &c. legetur aliquid ex designato piarum meditationum libro, quod præbeat materiam meditandi, peractaque lectione usque ad finem horæ silentes orabunt.

3 Hora verò ab ingressu elapsa, Præsides incipiente, dicant omnes Antiphonā Sub tuū prædiciū, Præsidesq; subiungat orationes, Protege Dñe, Ecclesiæ tuæ, Deus virtutum, Deus veniæ largitor, Prætende Domine quibus interdum poterit adiungi alia de venia Superioris, ac in hunc modum absolvatur oratio.

4 Curet autem Superior, ut inter Fratres non choristas totius noctis horæ distribuantur, ut orationi coram sanctissimo Sacramento vacent, quod si noctu vacare non possunt, communi intersint orationi, vel horis alijs à Superiore ipso designatis orent.

Cap. V. De Officio Divino.

VT perfectius obtemperetur Ecclesiæ, Regulæque nostræ, quæ divini officij debitum à Fratribus clericis requirit, præcipimus ut audito primo quarumvis Horarum Canoniarum signo, Fratres ab alijs operibus desistant, & ante ultimum signum ad locum designatum celeriter conveniant, ac inde ad Chorum, psalmum pro loci distantia alternatim dicentes, incessu gravi, modeste accedant.

SILE

B

4

ibiq;

ibique diuinum officium simplici uoce, uno, parique sono Ecclesiæ Romanæ more, iuxta litteras Sixti V. religiose persoluant.

2 Hora matutinæ semper media nocte dicantur, nisi obstat ugens necessitas, quæ quam rarissimè admittatur. Cum uerò ex tali necessitate, nocte media intermittuntur, illa prorogentur, ut ante horam orationis manè solitam recitetur, & statim solita fiat oratio; præterquam in Octaua Corporis Christi, in qua Ecclesiæ consuetudinem Fratres nostri poterunt obseruare.

3 Completorium in crepusculo, scilicet cum ad Salutationem Angelicam communiter pulsatur, semper recitabitur, nisi aliqua iusta causa prorogari, uel anticipari debere persuadeat.

4 Reliquæ Horæ Canonice à Fratribus loco, & tempore, modoque in Ordinario præscriptis pro diuersitate solemnitatum, sedatè dicentur.

5 In omnibus Cœnobijs diebus Dominicis, ac festis primæ, & secundæ classis, ac festiuitatibus Domini, & Beatissimæ Virginis, & in festis de præcepto anni totius, in festis quoque consuetudinis, quæ uim præcepti habeat, & in Sanctorum Religionis nostræ solemnitatibus Missa cantetur. In Sabbathis uero totius anni, iuxta modum in Ordinario præscriptum, Missa cantabitur, Antiphonæque

Salutæ

Constitutionum

Salve Regina in Sabbathis, & in uigilijs omnibus Beatissimæ Virginis canetur. Litaniz quoque Beatissimæ Virginis post Vesperas, & in Quadragesima post quietem meridianam in Choro recitentur.

6 Fratres non choristæ præcum suarum, debitum ex Regulæ præscripto soluant, festisque diebus maiori Missæ, ac Horis Vespertinis intersint.

Cap. VI. De sacris Confessionibus.

1 Sacramento poenitentiz cum intima culparum etiam leuium detestatione, nostri Fratres frequenter utantur, ut maiorem fructum percipiant.

2 Expedit autem ad huiusmodi fructum percipiendum designatos habere Confessarios. Quapropter statuimus primum ut Fratribus professis non sacerdotibus, duos, & ubi opus esse videbitur, plures ordinarios Confessarios à Prouinciali approbatos, Superior quisque designet, quibus tantum Fratres illi confiteantur. Extra quos Superior, cum expedire iudicauerit, poterit concedere, ut alicui Patri è Conuentu, etiam à Prouinciali non approbato, Fratres confiteri possint: quod & raro concedet, & ad vnamquamque confessionem sigillatim veniam dabit.

3 Ij verò, qui à Prouinciali ad confessiones

nes

hes audiendas Fratrum, veniam obtinuerint, in Conuentibus, quorum conuentuales sunt, sine Priorum expresso consensu ea fungi nequeant. Poteritque Prior, cum id in Domino expedire crediderit, ab ea functione suspendere Confessarios.

4 Si vero quis ex prædictis Confessarijs sine Prioris expresso consensu alterius Religiosi confessionem audierit, quamvis confessio valida sit, vterque tamen graui pœna puniatur. Quam etiam pœnam feret, omnis siue conuentualis, siue hospes, qui Confessarium è nostris nactus alicui extraneo confitebitur; etsi ad hoc Conuentus Superior ordinarius, licet in euentu raro, veniam dare possit.

5 Fratres nostri hospites, dum per Conuentus nostræ Congregationis transeunt, vel ibi hospitantur; Fratres item nostri omnes iter agentes cuilibet è nostris Sacerdotibus ad confessiones audiendas in Congregatione nostra approbatis, aut approbatis deficientibus, cuilibet simplici Sacerdoti nostro possint confiteri sine alia venia quorumuis Superiorum nostrorum.

6 Quando tamen nostri Fratres iter agentes, copiam Confessarij è nostris non habent, aut iusta de causa extra Conuentum manentes cõmodè nostris cõfiteri nõ possunt, Cõfessario externo, vel Religioso, vel seculari, si adsit, secus verò simplici Sacerdoti cõfiteri poterunt.

De-

7 Declaramus autem Sacerdotes nostræ Congregationis, qui Generalis, vel Prouincialis, vel Prioris respectiue, vel alias iuxta nostras Constitutiones licentiam ad confessiones audiendas non habent, non posse confessiones etiam Sacerdotum nostrorum audire, talesque confessiones nullas esse: et si quod esset priuilegium, vel consuetudo in contrarium, eidem præsentì statuto renunciamus.

8 Confessarij verò sic Fratribus nostris pœnitentiæ Sacramentum ministrent, vt facultatis suæ modum obseruent, prout in declarationibus expositum est.

9 Vniuersos autem Fratres hortamur in Domino, vt ordinario suo Confessario (quem leui de causa mutare non deberent) bis per hebdomadas singulas confiteantur. Prælatos etiam monemus in Domino, vt ad paternum erga subditos amorem fouendum, illorum confessiones libenter, & si ab eis petatur frequenter audiant: subditosque ipsos, vt Prælato suo crebrò confiteantur, vt is eorum morbos habeat exploratos, & paternis visceribus eos solari, mederi que valeat.

Cap. VII. De Eucharistiæ Sacramento.

Nihil est, quod ad vñionem diuinam æquè conferat, ac Eucharistiæ frequens, dignaque sumptio. Quamobrem statuimus

vt

vt Fratres nostri tam nouitij, quam professi non Sacerdotes omnibus diebus, Dominicis, festisque Domini, Beatissimæ Virginis, Angelorum, Apostolorum, Omnium Sanctorum, Ecclesiæ tituli, Patroni Ordinis, aliorumque similium sacram Eucharistiam sumant. Si verò festa nimis frequentia sint, ob Sacramenti venerationem Communio aliqua ad Superioris nutum poterit omitti. Ferijs etiam quintis si intra hebdomadam nullum festum occurrat Fratres nostri Communionem recipiant.

2. Vt verò Fratres tantum Sacramentum quietius recipiant, & gratias agant, aliquanto post Primam dictam priuatæ Missæ omnes simul interfint, & Eucharistiam simul recipiant: ijsque diebus de Eucharistia, aut solemnitate occurrente, vel quouis simili collationem spiritualement tempore solitæ recreationis meridianæ habeant.

3. Vniuersi autem Fratres, etiam Sacerdotes, die Cœnæ Domini, de Superioris celebrantis manu sacram Communionem sumant, nisi quis iusta de causa, & de ipsius Superioris venia sacrum eo die fecerit, iuxta morem patrię.

4. Caueant verò Sacerdotes, ne Missæ celebrationem, nisi ex morbo, aut graui necessitate, ac de Superioris concessu vlllo die prætermittant.

*Cap. VIII. De Examine conscientia, ac
Disciplina.*

PUrbandæ conscientiaë studium ijs, qui ad contemplanda diuina purgatos cordis oculos habere cupiunt, valde necessarium est. Quapropter Fratres nostri conscientiaë mundandæ curam gerant.

2 Primum quidem signo prandij dato, omnes in Chorum conueniant, genibusque flexis per octauam ferè horæ partem suas examinent conscientias, signoque surgendi dato, dicentes psalmum De profundis, ad refectorium ordinate procedant.

3 Deinde antequam cubitum eant, ad eundem modum conuenientes, conscientiam singuli suam examinent. Qui autem in Chorum ire nequiverit, vbicumque fuerit examen eiusmodi faciat.

4 Ut verò culpas quas Fratres per examen quotidianum in se ipsis agnoscunt, pœnitentiaë vindicta deleant; & pro Ecclesiæ pace, perfectione, & ampliatione Deum exorent; præcipimus, ut per totius anni cursum tribus in hebdomada diebus, feria nimirum secunda, quarta, & sexta, quandiu psalmus Misere mei cantabitur, singuli Fratres se ipsos in commune verberent: psalmo vero absoluto, dicent Antiphonam Christus factus est pro nobis obediens &c. Præsesq; subiunget Orationes.

tionem Respice, Protege, Ecclesiæ tuæ, Fide-
lium Deus, Præstende Domine; datoque signo
cessabunt. In hebdomada verò maiore tribus
cōtinuis diebus, scilicet feria quarta, quinta,
& sexta, ad Christi passionem celebrandam,
flagellabunt se in communi Fratres nostri,
quandiu psalmus Miserere ter cantabitur.

5 Ab ordinaria tamen disciplinæ lege in-
præfatis ferijs occurrentis dies festi Natiui-
tatis, feria secunda Resurrectionis, & Penteco-
stes excipiuntur; sed si in prædictis ferijs, se-
cunda, quarta, & sexta, Vigilia Natiuitatis
Christi, Circumcisio, Epiphania, aliaque simi-
lia festa inciderint, pridie illorum dierum,
se Fratres verberabunt; nisi fuerit Dominica,
quia tunc Sabbatho fiet.

Cap. IX. De Ieiunio, & mensæ frugalitate.

1 **C**um ieiunij fructus, quo mens alitur v-
berrimus sit, æquum est Fratres nostros
de prouentu maiore cogitantes, Ecclesiasti-
cis ieiunijs, quæ alijs communia sunt, alia plu-
ra, & longiora subiungere.

2 Quapropter, præter diuturnum illud,
quod iuxta Regulam ab inclusa Exaltatione
Crucis usque ad Pascha obseruatur, ieiuna-
bunt Fratres nostri omnibus Vigilijs Beatif-
simæ Virginis, & in Vigilia Corporis Christi,
die sancti Marci, nisi Dominica fuerit, & tri-
bus

bus Rogationum diebus, ac vniuersis sextis le-
rijs anni totius, ita vt in Quadragesima, Ad-
uentu, & Vigilijs Beatissimæ Virginis qua-
dragesimali victu, iuxta Patriæ morem, vtan-
tur: reliquis vero diebus lacteis cibus, & ouis
vesci possint.

3 In communi autem victu frugalitatem
commendamus, ita vt quamuis domus qua-
uis ex causa bonis affluat, non ob id solito
hucusque victui Prælatus quippiam nouum
apponat: sed necessarijs prouidè ministratis,
temperantiæ virtutem colat: si autem in hoc
genere deliquerit, ad nutum Præpositi punia-
tur.

4 Si vero (quod euenire solet) Fratribus
aliquid defuerit, meminerint se paupertatem
Christi profiteri, & intime gaudeant, oblato
tantæ virtutis exercitio.

5 Ex ijs ergo, quæ ad Conuentus nostros
Christiana charitas miserit, in refectorio (ex-
tra quod raro, & admodum iusta de causa,
Superiores vescantur, vel subditos vesci si-
nant) æquales partes omnibus ministrentur,
nullique vnquam diuersum aliquid, vel diuer-
se conditum absque necessitate, & Superioris
expressa venia detur. Superior verò contra-
facienti, sicut extra mensam, tempusque com-
mune comedenti pœnam mediam imponet.

6 Sedulo curet Superior vt omnes ad pri-
mam mensam conueniant; extraneos verò

præ-

præsertim sæculares admodum rarò, & cautè ad communem mensam introducat. Nemini autem cuiusvis conditionis carnes villo prætextu in refectorio apponantur, neque extra, nisi infirmis: similiter non apponantur etiam hospitibus alterius Religionis, immò neque sæcularibus.

7 Si quis ad urbem, oppidumvè, vbi Conuentum habemus, è claustro exierit, nullam escam ibi sumat, nisi rarò, & ex graui necessitate, ac de Superioris expressa venia. Superior vero transgressori grauem pœnam imponat.

8 Carnibus autem extra claustra, nec subditi, nec Superiores vescantur, nisi ægrotantes, habitaq; Prælatorum venia, quam secum è Monasterijs scriptam ferant. Qui verò in hoc deliquerit, grauem pœnam per duos dies intercalatos ferat.

9 Hortamur autem Fratres nostros extra claustra iusta de causa vescentes, ne facile vtantur indulgentia Regulæ, quæ pulmenta cum carnibus cocta permittit, ne sint hospitibus onerosi, quod efficient, si leui de causa non credant se fore hospitibus onerosos.

Cap. X. De Fratrum indumentis.

1 **V**estium asperitas, & ruditas viros Apostolicos decet.

2 Sint ergo vestimenta Fratrum nostrorum

rum clericorum ex rudiori panno eiusdem in omnibus forme, & coloris grisij, præter pallium, & præter interiorem tunicam, & subligacula, quæ alba erunt.

3 Habitus usque ad tres ferè digitos à solo sit longus, cuius inferior circuitus duodecim, vel pro corporis quantitate, quatuordecim palmorum latitudinem non excedat, manica duorum palmorum breuium ambitum habentes ad manus medias pertingant.

4 Scapularis latitudo palmum vnum, ac dimidium non excedat, longitudo palmum vnum à solo desinat.

5 Caputium grisium, & album capitis formæ respondeat, & nullum in occipitio cacumen habeant, quorum latitudo qua parte super humeros cadit sit paulo extensior scapularis latitudine, & à tergo altius zona digitos quatuor in acumen desinat.

6 Zona sit coriacea, & nigra, duos digitos lata, quæ rudi fibula ferrea, vel ossea stringatur, & circiter palmum à solo desinat.

7 Pallium palmo vno altius scapulari desinat, cuius latitudo corpori ita respondeat, vt neque nimis angustum, neque amplum sit.

8 Tunica exterior, (quæ indigentibus concedi poterit) sit eiusdem coloris, cum habitu, supernè stricta, inferne latior, & habitu aliquanto breuior.

9 Tunica interior lanca sit è tenuiore
C flamme,

stamine, quàm exterior, & altius terra palmos duos desinat.

10 Subligacula ex rudi tela linea fiant, quæ ob pudorem, nunquam exuantur, & sub genua desinant.

11 Sudariola ad emungendas nares lancea sint, colore habitui similia, vel ex eo, & albo mixta.

12 Sandalia sint coriacea, quæ quibusdam corij particulis, velut brachijs, latitudinis quasi digiti vnus calcaneo, & medio pedi soleas astringant, & quoad cetera, pedes nudos ostendant: quæ duas, vel tres tantum soleas habere præcipimus.

13 Hæc Fratribus choristis erunt communia. Tonsura vero ita fiat, vt corona, seu clerica tres circiter digitos sit lata, & super aurium summitatem desinat. Barba ultra dimidium digitum latum non nutriatur.

14 Nouitij ijsdem vestibus induantur, sed ad professorum discrimen, è desinente à tergo caputio appensam rudis panni oram gerant.

15 Fratres verò Donati pallio, cæterisque vestibus eiusdem cum habitu nostro grisi coloris sine caputio vtantur, eorumque habitus palmum dimidium à solo desinat.

16 Prior vestes alias, aut alterius formæ ultra præscriptas non permittet. Si vero contraxerit, ipse, ac is, cui licentiam concesserit, graui pœna puniatur. Non tamen propterea

pterea charitatem erga ægrotantes, & debiles volumus diminui, quibus omnia necessaria ministrari præcipimus, ita tamen, ut paupertati congruant.

17 Fratres dum cubant, scapulari paruo utantur, quod saltem duobus palmis sit longum, & vno latum, quo simul & tunica interiore accinti dormient. Qui autem in hoc defecerit pœnam mediam feret, sed qui tunica interiori exutus dormierit, graui pœna punietur.

18 Animaduertant verò Fratres, palmum, quo in hoc capite vti sumus, nō esse eum, quod ædificia metimur, sed breuiorem alium, cuius mensura ad Constitutionum calcem describetur.

19 Denique nullus sanus, vel æger suum habitum, hoc est scapulare exuat, sed ægrotantibus tenuius permittetur.

Cap. XI. De Silentio.

1 **C**um linguae licentia instituti nostri pariter potiore, qua mens tacita Deo vacat, graniter lædat: Fratres nostri sint tardi ad loquendum, temporaque distinguant.

2 Quando enim silentium illud sanctum colitur, quod iuxta Regulam, à Completorio vsque ad proximi diei Primam dictam extenditur, verba omnia, quæ sine detrimento in

C 2 tempus

tempus silentij non adeo strictè differri possunt, sub pœna media prohibemus.

3. Reliquo vero diei tempore, licet nō præcipiamus adeo strictè silentiū coli, valde tamen illud commendamus. Propterea præcipimus, vt nullus Fratrum cum alio seu Religioso, seu sæculari ex professo loquatur, nisi de expressa Superioris venia, & tūc voce submissa.

4. In Choro autem, Claustro, Dormitorio, Refectorio, & Cellis, quæ loca sanctiora sunt religiosius Fratres silentium obseruent.

5. Verba omnia otiosa, non tantum noxia Fratres nostri accuratè vitent, & ex more Sanctorum de pijs rebus, iuxta oblatas sibi occasiones, sermonem instituunt. Sæculares autem, cum quibus agent, pijs sententijs ad rem prudenter accommodatis, semper ad pietatem hortari conentur. Qui vero in prædictis occasionibus inter Religiosos contrafecerit leui pœna, qui autē inter sæculares media puniatur, & præterea Superior abstrahat eū ab occasionibus cū sæcularibus colloquēdi.

6. Fratres nostri inter se amanter valde, suauiterq; loquantur, qua in re si defecerint, pro culpa modo pœnam ferant.

7. Cum vero in commune opus aliquod efficiunt, vel sileant, vel psalmos recitent, vel etiam de diuinis rebus verba faciant, aut de nique alijs audientibus, pium aliquid vnus ē libro legat, ne Regulæ nos in silentio opera-

si præcipientis , spiritum extinguant .

*Cap. XII. De otio vitando, & cellarum
recessu .*

VT Regulæ nostræ otium vitandum gra-
uiter monentis sensum obseruemus, præ-
cipimus, vt nullus Superior Fratres in Clau-
stro otiosos esse permittat ; sed curet, vt om-
nes intra , vel extra cellas vtiliter occupen-
tur ; singulisque spiritualia , vel corporalia
exercitia, prout expedire in Domino putaue-
rit, præscribat .

2 Cum verò Regula præcipiat, vt maneant
singuli in cellulis suis, præcipimus Superiori-
bus, vt Fratres duos in cella vna manere non
patiantur. Non solum autem Fratres nostros,
singulos in cellulis suis manere , sed neque
nocte, neque die alterum in alterius cellam
ingredi posse decernimus, contra verò facien-
tes die, mediam pœnam, nocte verò grauem
ferant . Qui verò quouis tempore Superioris
absentis cellam ingreditur grauem pœnam
semper incurrat .

3 Ne quis autem Regulæ verba ad otio-
sum egressum detorqueat; declaramus ea ver-
ba (iuxta eas) vbi præcipit singulos in cellulis
suis , vel iuxta eas manere ; de illis cellulis
aperte intelligi, quæ olim, & nunc alicubi se-
paratæ construuntur , iuxta descriptionem

habitationis eremiticæ postmodum tradendam, non verò de Claustri cellis, inter quas nihil est interualli.

4 Quamobrem nullo tempore liceat ulli in nostris Conuentibus degenti, extra cellas ex professo manere, vel deambulare, nisi de Prioris expressa venia. Quòd multo arctius obseruandum est à Completorio expleto. Tùc enim Fratres statim in cellas suas se recipere festinabunt, è quibus nisi ad necessaria naturæ, aut sinè Superioris venia non exhibunt. In cellas autem ingressi à quouis strepitu abstincent, qui à proximis cellis possit audiri.

Cap. XIII. De modo quoad exitum è Claustro.

IN Regula nostra grauitè decretum est, vt semper in cellis Fratres nostri perseuerèt, nisi alijs iustis occasionibus occupentur.

2 Quia verò eiusmodi iustæ occasiones plures, quam sint facile finguntur; monemus Fratres nostros, vt parce admodum è Claustro exeant, festis præsertim diebus, quibus domi attentius Deo vacandum est.

3 Vt autem huic rei modus imponatur; statuimus, vt Fratres nostri ad eleemosynas ostiatim mendicandas nunquam foras egrediantur (licet hoc per Donatos fieri non prohibeamus) neque etiam exeant ad mortuos

tuos sepeliendos, neque ad processiones publicas, nisi in terris infidelium, vel ubi hæreses grassantur, quando peculiarior ibi aliqua necessitas virget.

4 Ad confessiones vero audiendas, & iuandos morti proximos, aliaq; similia pietatis officia, Fratres nostri vocati prodire valeant; ita tamen, ut recessus curam exactam gerant, neque propter iuandos morti proximos (quantum per ipsos fieri poterit) extra Claustra pernoctent. Quod si omnino pernoctandū sit, venia Superioris prius impetretur.

5 Nullus è nostris Fratribus subditus, aut Superior etiam confessionis, aut prædicationis gratia ad Monasterium aliquod Monialiū accedat, nisi earum Superior id petat; & tunc fiat de Prioris expressa venia, sub vocis, ac loci priuatione ipso facto incurrenda. Nullus è nostris Fratribus esse possit ordinarius Confessarius Monialium aliorum ordinum.

6 Nullus præterea è nostris extra Conuentum habitare sinatur, etiam ut alicui Cardinali, vel Principi sit à sacris confessionibus.

7 Prior, & Procurator, quorum exitu, & labore cæteri Fratres intra Claustra perseuerant, ad expedienda negotia iusta ex causa egrediantur. Hortamur autem illos ut (si fieri possit) negotia omnia in vnum, duosue dies hebdomadæ conferant, quibus ea prodeuntes expediant. Quia vero externa negotia pie-

tatis intuitu suscepta, observationem Regulæ nostræ recessum tam seriò præscribentis frequenti exitu enervare possent; præcipimus, vt Fratres nostri, tam Superiores, quam subditi, iuxta consilium Apostoli aientis: Nemo militans Deo implicat se negotijs sæcularibus: ab sæculi negotijs, etiam pietatis obtentu gerendis, accuratissimè abstineant, nisi charitate christiana cogi videantur: neque Superiores, vel subditi admittant alicuius negotij expeditionem, etiam pietatis prætextu, ad quam è Claustro sæpe prodire sit necessarium, sub pœna de illis pro culpæ modo sumenda. Alij vero Fratres præter supradictos, & hospites, nisi subsit iusta causa, raro valdè admittenda, puta pietatis, aut sanitatis, & tunc re quoque bene pensata, & primo Discreto consulto, à Superiore foras non mittantur.

8 Fratres domo exeuntes, ac redeuntes coram Sacramento, vel alio ad id designato loco breuiter orent, vt Deus illorum exitum, introitumque custodiat, & Superioris benedictionem flexis genibus poscant; nullus autem è nostris etiam hospes, Claustro sine Superioris venia egrediatur, sub graui pœna.

9 Qui domo ad aliquid designatum exit, nihil aliud efficiat, nisi quid necessarium se offerat, quod simul ac domum peruenerit, Superiori aperiat; quod etiam obseruent iter agentes, sub graui pœna.

Prior

10 Prior, aut Vicario foras egresso, qui domui præest, nec exire, nec exeundi veniã alijs, quã Procuratori ad negotia expedienda, aut Prædicatori ad concionandũ, & Confessarijs ad infirmos audiendos egressuris dare poterit. At si necessitas vrgeat, vt ipse, vel alius exeat, ex consilio, & consensu trium Fratrum antiquiorum id fiat.

11 Prior, nec exire, nec alteri veniam exeundi dare possit vltra triginta italica miliaria, & cum sic exierint, facultatem scriptã, & obsignatam secum ferant, quam etiam non petitam Priori, aut Præsidenti aliorum Conuentuum statim, ac peruenerint, ostendant. Nullusque sine socio, nisi ex iusta admodum causa iter agere sinatur, binos enim Dominus Apostolos misit. Bini ergo exeũtes indiuidue procedant, semperq; antiquior in itinere præfideat, nisi iusta de causa Prior aliud decreuerit.

12 Dent operã Fratres nostri, vt omnibus, cum quibus extra Claustra conuersantur, bonum exemplum præbeant, & eos ad pietatem hortari, solari, ac Deo lucrari curent. Quod si quis contrafecerit, ac in itinere grauiter deliquerit à viciniore Priore, vel Præsidente puniatur.

13 Nullus Frater intra vrbes, oppidavè nisi ob necessitatẽ Superioris arbitrio declarandã curru, leætica, vel sella gestatoria vehatur.

Vni-

14 Vniuersi Fratres pedites iter agant, si vero necessitas aliud postulet, Præpositus, Pro-
uincialis, Prior, aut Præsicens, expensis, colla-
tisque circumstantijs (vnusquisque prout ei
per Constitutiones conceditur) dispensabunt.
Qui autem ex necessitate pedes ire nequie-
rit, veniam equitandi secum ferat, & iuxta
morem Patriæ humiliter vehi curet.

15 Ferant secum Fratres nostri in alia lo-
ca euntes litteras patentes, in quibus expri-
matur cuius Cœnobij conuentuales sint. Quia
in re ne aliquod dubium oriatur, declaramus
ex quo intimantur eiusmodi litteræ, cum ex-
pressionem conuentualitatis, quemlibet Reli-
giosum incipere esse conuentualem illius Cœ-
nobij, quod ei assignatur, & desinere esse con-
uentualem cuiuslibet alterius.

16 Monemus autem eos, qui pedites ince-
dent, vt semper curent eleemosynas mendi-
care; eos verò qui ex necessitate equitabunt
ita se gerere, vt paupertatem, quam Deo vo-
uerunt, præ se ferant.

17 Nemo è Conuentu, sub prætextu Supe-
riores suos adeundi, quauis iusta de causa,
egrediat, sine venia eius, quem adire volue-
rit, sub pœna pro culpæ modo ei imponenda.

Cap. XIV. De vita communi, ac regulari.

I VT inter nos more nascentis Ecclesiæ, sit
cor

cor vnum, & anima vna res etiam externas, & actus oportet esse communes.

2 Ut autem omnibus pateat, quid sit vita communis, declaramus, communem vitam esse, cum ex communibus officinis res necessaria, Superioris concessu, singulis ad vsum tribuuntur: nec priuatim aliquis quicquam possidet, sed statim, ac eo, quo utebatur non indiget, in communes officinas refert.

3 Hanc ergo communis vite rationem, vniuersi tam Prælati, quam subditi perfectè sequantur, non personarum, sed solius necessitatis modum attendentes.

4 Quia vero communis vite ratio, regulari vite, iuxta nostrum institutum coniungi debet, præcipimus, ut nullus Prælatus extra ordinem negotijs, quamuis pijs, ipsi etiam prædicationi adeò incumbat, ut non possit quotidianis actibus vite regularis, maiori saltem ex parte interesse.

5 Denique, ut nec in sermone inter nos aliquid singulare sit, prohibemus Fratribus nostris quemcumq; Doctorum, seu Magistrorum, aut cuiusvis alterius nominis gradum, accipere, vel ob id vlla exceptione gaudere, aut eiusmodi nominibus appellari.

6 Soli & omnes Sacerdotes vocentur Patres, qui vsitato nomine (Vestra Reuerentia) appellabuntur, reliqui autem Religiosi vocentur Fratres, qui (Charitas Vestra) ex more di-

can-

cantur, nullusque Frater alium quemuis, etiā Præpositum, Reuerendissimi Patris, vel Vestræ Paternitatis titulo appellet, sub pœna media. In communi vero Tabula officiorum, humilia quæque, etiam Superioribus iniungantur, ne quid, vel ad charitatem, vel ad humilitatem, desideretur.

Cap. XV. De ordine, ac sedibus Fratrum.

ET si primos accubitus non amare, ac in nouissimo loco sedere Christi consilium sit, quod per affectum quisque amplecti debet, externè tamen ad tuendum decorem domus Dei subsequens discrimen sedium extra Capituli, & Definitorij tempora obseruandum est.

1 Primo igitur totius Congregationis loco sedebit Præpositus, qui officio suo expleto nulla prærogatiua gaudebit, sed pro suæ professionis antiquitate sedebit inter alios.

3 Secundus locus erit Prouincialis in sua Prouincia, tertius erit Prioris vniuscuiusque in suo Conuentu: quem quarto loco sequentur Definidores generales pro suorum officiorum serie. Mox Procurator generalis, deinde Prouinciales alij, postea Priores hospites, qui ibi forte aderunt, pro suarum domorum antiquitate, exinde Vicarius, vel Supprior, post quem immediate sedebunt Suppriorès hospites, eo ordine, quo de Prioribus dictum

est.

est. Postea Sacerdotes professi iuxta antiquitatem professionis, deinde Fratres clerici professi sacris initiati, ita ut Diaconus Subdiaconum antecedit, & inter initiatos eisdem sacris antiquior professione sit loco prior. Post hos Fratres clerici sacris non insigniti secundum professionis antiquitatem, qui omnes si fuerint professione æquales, præcedat ætate prouectior. Postea Nouitij clerici, inter quos si quis fuerit Sacerdos, vel sacris initiatus respectiue ceteros nouitios præcedat. Postmodum Fratres non clerici pro discrimine antiquitatis.

Cap. XVI. De honesta Fratrum recreatione.

Iuxta disciplinam sanctorum Patrum, qui laborem intermittere consueuerunt, ut diutius laborarent; præcipimus, ut quotidie statim à prandio in opportunum aliquem locum Fratres omnes conueniant, & ibi per unam horam mutua charitate simul latè permaneant, ubi de rebus spiritualibus, ac honestis iuxta Instructiones loquantur, & ordinariè ijs, quæ in commune dicuntur attendant.

2 Per omne ieiuniorum nostrorum tempus à Regula præfixum, vespertina recreatio non sit, præterquam in studiorum Conuentibus ijs diebus, quibus conclusiones defenduntur. At Superior facile det veniam, & cum expedire vide-

videbitur, præcipiat, festis præsertim diebus, ut Fratres absoluto vespertino officio, ante Completorium à labore aliquantum simul recreentur. Eo verò tempore, quo ex Regula nõ ieiunatur, Vesperii Fratres aliquantum recreentur, ita tamen, ut Completorium in crepusculo, idest cum pulsatur signum Salutationis Angelicæ, dicatur.

3. Nouitij cum ipsorum Magistro, vel alio illius vices gerente, seorsum in loco recreationis conuenient, nisi cum Prior aliter decreuerit.

4. Singulis annis quater, vel sexies ut plurimum, omnes Conuentus Fratres foras exire possint. Caueat autem Superior, ne Conuentus debita custodia destituatur.

5. Sæculares vero à nostris recreationibus absint, nisi necessitas ineuitabilis aliud requirat.

Cap. XVII. De suffragijs pro Defunctis.

Sint Fratres nostri ad pœnas animarum, et quæ igne Purgatorio torquentur, leniendas admodum misericordes, statimque ac Frater aliquis obiit, Prior Prouincialem, ipse verò prouinciæ suæ Priores, ac Præpositum, Præpositus verò Congregationem confestim moneat, ut pro eo subiecta suffragia fiant.

1. Pro vnoquoque Religioso professo in eo Con-

Conuentu vbi interierit officium sepulturæ ,
& officium integrum Defunctorum cum Ve-
speris, & Missa cantabitur: in alijs verò omni-
bus Conuentibus suæ Prouincię canetur Mis-
sa, & officium integrum recitabitur. Insuper
quilibet Sacerdos domus in qua decessit, tres
Missas pro eo dicet, vnam vero omnes alij Sa-
cerdotes omnium Conuentuum illius Prouin-
ciæ. Præterea in alijs totius Congregationis
Prouincijs, in quolibet Conuentu vna Missa
conuentualis cantabitur, & recitabuntur Ve-
speræ , & vnum nocturnum Defunctorum. Fra-
tres verò choristæ tam eiusdem Monasterij ,
quam totius Prouinciæ vnum integrum offi-
cium Defunctorum , Fratres vero non cleri-
ci eiusdem prouinciæ vnum integrum Rosa-
rium, reliqui autem totius Congregationis Sa-
cerdotes tertiam partem Rosarij recitabunt.
Pro patre vero Præposito in tota Congrega-
tione dupla suffragia fiant, & officium Defun-
ctorum vbique cantabitur. Pro patribus ve-
ro Definitoribus generalibus, & Procuratore
generali in tota Congregatione, pro patribus
Prouincialibus in sua prouincia , & pro Prio-
ribus in suo Conuentu, præter illa, quæ pro cæ-
teris Fratribus dicuntur, Missa vna priuata à
Sacerdotibus singulis, vnum officium Defun-
ctorum integrum à singulis choristis, & Rosa-
rium integrum à non choristis recitentur.
Cum obierit Frater aliquis professus non cho-
rista

rista pro eo eadem, quæ pro cæteris Religiosis professis suffragia fiant. At pro Nouitio quouis siue clerico, siue non chorista, die obitus fiant suffragia in eo loco, vbi decedit, æquè ac pro quolibet professo.

3 In quolibet Monasterio vniuscuiusque Prouinciæ Monialium nostrarum canetur Missa vna conuentualis, & recitabitur vnum officium integrum Defunctorum pro quouis Fratres nostro in ea Prouincia obeunte, laicæ vero Moniales tres partes Rosarij recitent. Fratres vero nostri in quolibet Conuentu illius Prouinciæ pro Moniali decedente vnā Missam conuentualem canant, vnumque nostrum Defunctorum cum laudibus recitent. In Conuentu autem, à quo Monialibus nostris Sacramentum pœnitentiæ ministratur, quilibet Sacerdos pro singulis Monialibus eius vrbis, aut oppidi Missam vnā priuatam faciet.

4 Simul ac obitus D. N. Papæ, ac Illustrissimi Protectoris sciatur exequiarum solemniū officium pro eis in Monasterijs omnibus totius Congregationis fiat.

5 Feria secunda per integrum annum fiat sacrum pro Defunctis nostris, scilicet, pro quo nulla eleemosyna recipiatur, & (excepto Paschali tempore) Vesperæ Defunctorum (præterquam in festis de præcepto, & quæ solemniter celebrantur in Congregatione) post illius diei Vesperas recitentur.

Tri-

6 Tribus præterea anni temporibus, inter octauam scilicet Epiphaniæ, & Purificationē, inter octauam Resurrectionis, & Ascensionē, inter octauam sancti Michaelis, & festum Omnium Sanctorum fiat commemoratio pro Defunctis, ita vt singulis illorum trium temporū recitetur triplex officium integrum Defunctorum, & tres Missæ cantentur.

7 Quæ quidem suffragia pro Fratrum nostrorum animabus; pro eorundem Fratrum consanguineis, affinis, amicis; pro ijs, qui in nostris Monasterijs sepulti iacent; pro benefactoribus, & sæcularibus, qui fraternitatis litteras habuerunt, exoluenda sunt; quæ statim primis trium designatorum temporum diebus omnino fiant.

8 Sit locus à sæcularium sepulchris separatus, vbi Fratres nostri sepeliantur; sit etiam liber in quo defuncti Fratres scribantur, vbi is, cui rem Superior commiserit, annotet nationes, & nomina, subijciatque compendium virtutum eorum, qui sanctitate clauerunt, vt posterius ad virtutis æmulationem excitentur.

9 Nulli sæcularium Capella, vel peculiare sepulchrum sine Præpositi, vel Prouincialis venia detur. Quod si Præpositus, vel Prouincialis consuli nequeat, id fiat de cōsensu Conuentus. In communi verò sepultura, de consensu Conuentus poterunt sæculares sepeliri.

10 At pauperes aliàs sepultura carituri

D in

in nostris Ecclesijs sepeliri poterunt. De quarta vero funerali nulla cum Parochis controversia sit, sed libenter eis Fratres nostri pacis amore cedant.

Cap. XVIII. De Charitate erga infirmos.

1 **C**haritas ad consolandos solatio destitutos propensa est. Quare nauent operam Fratres nostri, ut & consilio, & obsequio egros consolentur: & Superiores de spirituali, corporalique ægrotantium remedio singularem curam gerant.

2 Vt autem expurgata conscientia morbi labor sit fructuosior, statuimus, ut statim, ac Frater aliquis in morbum inciderit, confiteatur, & sacram Eucharistiam recipiat: deinde ubi ex morbo non periculoso, sed longo decumbit, per hebdomadas singulas semel saltem confiteatur, & sacram Eucharistiam recipiat: imminente verò periculo Eucharistiæ (quantum pro Sacramenti reuerentia licebit) frequenter sumat.

3 Prior Fratribus ægris Fratrem aliquem, ut eis ministret, probum, sedulum, moribusq. suauem designabit, qui eos quasi nutrix, fouere, solarique possit, & tam ipse Prior, quam Procurator omnia à Medicis præscripta diligenter prouidebunt. Quorum incuria, si quis ægrotus periclitetur, seuerè proculpæ

culpx modo puniantur.

4. In eo Monasterio, vbi Frater aliquis in morbum inciderit, maneat, quousque conualescat, nisi Prepositus, vel Prouincialis aliud præceperit. In ædibus vero secularium etiam consanguineorum, neque curentur ægri Fratres, neque conualescant, nisi adeo gravis infirmitas, ut iuxta consilium Medicorum calum mutari debeat. Quo in casu solummodo Frater aliquis infirmus de cōsensu Prioris, ac Discretorum poterit extra Clausurā mitti.

5. Dent operam Superiores, ut in quouis Conuentu Valetudinarium construatur, vbi sint Fratres ægroti, & admodum debiles, extra quod Fratres decumbentes ultra triduum manere non permittant, sed illuc deferri præcipiant, quotidieque ibi (si commodè fieri potest) ægroti omnes Sacrum audiant.

6. Prior ipse quotidie Fratres decumbentes paternis visceribus visitet, aut impeditus, alteri id officium committat, & animaduertat qua charitate illis inseruiatur. Singularem quoque curam gerat de victu eorum, qui, ut conualescant, in refectoriolo carnibus vescuntur.

7. Aegri vero Fratres nostri, si quid eis, (ut solet ad experimentum patientiæ, ac meriti augmentum) defuerit, meminerint se Christi paupertatem spontè quæsisse, ac nolint sibi, quasi diuitibus ministrari.

D 2 Cap.

Cap. XIX. De Hospitalitate.

1 Hospitalitas merito colenda est ab ijs, qui charitatem profitentur: charitas enim non querit quæ sua sunt, sed quæ aliorū. Vniuersi ergo Conuentuum nostrorum Superiores, cum expedire in Domino censuerint, hospitales sint erga omnes, sed potissimum erga Religiosos alios inopes, à quibus si noti non sint, Ianitor litteras patentes prudenter petat, & ad Superiorem deferat.

2 Erga Fratres vero nostros præsertim hospitalitatem exerceant, & aperta charitatis significatione eis sine vlla exceptione necessaria prouideant, sub pœna graui. Qua etiā pœna puniantur, qui cum ad Conuentum peruenire tempestiuè possunt in eo loco, vbi Conuentum habemus, apud alios etiam Religiosos vescuntur, vel hospitantur, vel pernoctāt, quæ omnia eis prohibemus. Ijs autem, postquam accesserint ad Conuentum, vt à labore itineris recreentur, licebit per duos dies communibus actibus non interesse.

3 Fratres nostri hospites, quamdiu in alio è nostris Conuentibus manent, quauis de causa nec petant, nec mutuum aliquid accipiant, sine Superioris loci illius scitu, & consensu, sub pœna pro culpæ modo de illis sumenda.

4 Sit Frater aliquis designatus ad excipien-

piendos hospites, moribus suavis, cui tantū loqui, agereque cum hospitibus liceat. Qui præter hunc ex professo cum hospitibus verba fecerit, pœna media puniatur.

5 Pater Procurator generalis Hispania, eiusque Socius, & alij inde missi insigni charitatis significatione in omnibus nostris Conuentibus hospitentur; & quamdiu eis placuerit, commorentur, ac eis seu valentibus, seu ægrotantibus per omnia prouideatur. Quod si præfatus pater Procurator Socio caruerit, socius ei è nostris Fratribus ad sua negotia expedienda promptè semper offeratur.

6 Hospites sæculares, nisi fortè ij sint, qui de Congregatione benemeriti fuerint, in nostris Conuentibus non immorentur, At si eius modi sint, detur opera, vt quam breuissimè maneant apud nos, ne illorum gratia aliquid indulgentiæ contra legum observationem admittatur.

7 Ad spiritualia verò exercitia sæculares admitti poterunt: ij autem, qui iusto timore graua pericula fugiunt, vltra tres dies in Conuentibus nostris latere non sinantur, nisi forte grauis necessitas ex charitatis lege ponderanda, aliud requirat.

Cap. XX. De sacris concionibus, & Sacramenti pœnitentiæ ministerio.

CAUEANT Fratres nostri ne (quoad per institutum nostrum licet) proximorum salutem negligere videantur. Propterea precipimus, vt in omnibus Monasterijs, (exceptis Studiorum, Nouitiatus, & Eremiti Conuentibus) si populi concursus sit, Superiores curent diebus festis haberi concionem.

2. Conciones etiam habebunt Fratres nostri ad Confratres Societatis Beatissimæ Virginis, quæ in nostris Conuentibus poterit institui, habita ratione, vt eius exercitia, a nostro instituto aliena non sint.

3. Integra vero Quadragesima extra nostras Ecclesias sine Præpositi, vel Prouincialis venia nullus Frater concionetur, & Præpositus, Prouincialisque Concionatoris extra Conuentum integra Quadragesima permittitur, probitatem considerent. Prædicationis etiam gratia de Præpositi, ac Definitorum generalium, seu Prouincialis, Definitorumque, Prouincialium consensu ob grauem necessitatem instantem per dies aliquot Fratrum missiones fieri poterunt ad loca ultra triginta italica miliaria distantia, quæ verbi Dei necessitate laborant. Sed vt ad tantum onus

Con-

Concionatores se pręparare valeant, Superior tempus, quod in Domino necessarium arbitrabitur, eis ad studium, & orationem ab alijs actibus immune concedat.

4 Superiores autem omnes Fratribus nostris concionaturis concedere poterunt, ut per triduum ante concionis diem actibus Chori non intersint. Orationi tamen mentali communi intererunt.

5 Nullus ę nostris Concionatoribus, seu Confessarijs ob eas functiones, aut occasione inde accepta eleemosynā petat, ne actiones, quę omni labe carere debent, in aliquem, nisi solius pietatis quęstum vertantur.

6 Priusquam Concionatores eo fungantur officio in Scriptura sacra, Sanctorumque lectione sint idoneę versati, qui per duos saltem annos Theologię Scholasticę, vel sacris Canonibus operam dederint: semperque solida, & vtilia populo prędicabunt: alias si a Superiore moniti non resipuerint, a Pręposito vel Prouinciali eis prędicatio prohibeatur.

7 Ut autem idoneos verbi Dei ministros Religio nostra habere possit, Prępositus, & Prouincialis nemini ad concionandum, aut confessiones Fratrum, vel sæcularium audientias veniam det, priusquam a Priore, primoque Discreto, & alio examinatore, quem Conuentus elegerit coram omnibus Capitularibus ri

gidè examinetur . Quod si is à Capitulo prius quo ad mores, & postea ab examinato-ribus quoad scientiam per secreta suffragia approbetur, Prouincialis de re certior fiat, qui postea quid fieri oporteat, deliberabit . Idemque seruata proportionem fiat, non modo quoties aliquis Frater primum concionaturus, vel sacras confessiones auditurus est, sed etiam quoties Ordine sacro est initian-dus. Nemo confessiones mulierum audiat, qui triginta annos non expleuerit, nisi Prouin-cialis cum aliquo iustis de causis dispensa-uerit .

8 Qui pro venia Sacramentum pœnitent-iae ministrandi Ordinarios adierit, facul-tatem non tantum à Præposito, vel Prouin-ciali, sed à suo etiam Priore subscriptam, ferat .

9 Quo autem Fratres nostri tanti Sacra-menti fiant idonei, ac fideles dispensatores, de ratione hoc Sacramentum rectè ministran-di, vno die per hebdomadas singulas hora vna designata mutuo conferant .

Cap. XXI. De Capitulo Conuentus,
& quotidiana correptionis
charitate.

INter charitatis opera primum locum obtinent, quæ comite prudentia non iam ad animos auertendos à culpis grauioribus, sed ad promouendos in altiorē sanctitatem, frequentari solent; cuiusmodi sunt illæ correptiones, quæ ex more Sanctorum in Claustris exercentur.

2 Propterea ordinamus, vt in singulis nostrorum Fratrum Conuentibus, Capitulum per singulas hebdomadas, vt in Regula sancitum est, semel saltem à Priore, Vicario, vel alio ex illorum expressa commissione fiat, in quo de culpis ordinarijs ad Prælati iurisdictionem spectantibus ex charitatis affectu Fratres corripiantur. Si enim alia extraordinaria culpa detegeretur, maturiore consilio remedium à Superiore prouidendum esset.

3 Capitulum mane fiat, qua hora communis oratio fieri deberet. Exhortatio vero ultra dimidiam horam, culparumque correptio ultra dimidiam aliam, pauloue amplius non durabit.

De

4 De vnoquoque Fratre se ad correptionem prosternente, Zelator è patribus Capitularibus per hebdomadas singulas designandus, sincere, ac sine vlla exaggeratione culpas proferat, & statim cæteri Patres iussi à Superiore.

5 Quicumque alium admonuerit culpas omnes ad illum attinentes vno contextu proferat. Ille verò qui corripitur, monitionem humiliter ferat dicatque (mea culpa) & se prosternat, donec dato signo caput eleuet. Dato autem signo, & eleuato capite correptionem genuflexus, & tacitus audiat, nec de se ipso defendendo cogitet, memor Christi, qui accusatus siluit. Si vero de afferenda excusatione à Superiore moneatur, parce, ac velut coactus illam proferat. Qui secus excusationem attulerit grauem pœnam sustinebit.

6 Si quis à nemine admoneatur, & se ipsum accusare velit se prosternat, & signo dato, caput eleuet, ac genuflexus culpam aperiat, correptionemque libenter audiat.

7 Nullus in Capitulo etiam cum Superiore, nisi iussus, vel petita, impetrataque venia loquatur sub pœna graui. Si quis verò in iancto ei silentio non statim obedierit, è Capitulo expellatur, pœnamque grauem sustineat.

Quod

8. Quod ad actuum Capituli seriem modumque spectat, ceremoniarum in Ordinario præceptis seruabuntur. Finita vero culparum correptione, Superior interroget Patres, an ad rectam domus gubernationem aliquid fieri expediat; simplex etiam rogabit, ut si quas in eo culpas animaduertant, eum seorsum in cella moneant, vel Patrem aliquem de ijs certiores faciant, qui postmodum eum admonabit.

9. Solemnissimis anni festis, vel eorum Vigilijs de culparum correptione non agatur; sed Superior, vel alius, cui ab eo iniungitur de festo sermonem habeat. In Epiphania tamen Domini, & in Exaltatione sanctæ Crucis post exhortationem Votorum renouatio; sponsones autem, & collationes in Exaltatione sanctæ Crucis post prandium, fiant, ad cursum ieiuniorum feruenter incipiendum.

10. Singulis præterea diebus (præter festa valde solemnia, & nonnullas insignium solemnitatum Vigilijs, & quatrimum ante Pascha, pridieque diei Capituli Conuentus) Prior, aut Vicarius, & cum illi absunt Suprior, vel de expressa Prioris, vel Vicarij venia alius, surgente Zelatore, ac postquam ei fuerit iussum, leues culpas sincerè proferente, Fratres ex charitate corripiet. Fra-

tres

tres verò singuli, statim ac à Zelatore nominantur, & alij se ipsos accusare volentes, dicentes, mea culpa, se prosternant, & humiliter admonitionem audiunt, & pœnitentiam impossi-

ram impleant. Illos verò

(ne quotidiana cor-

reptio molesta

fiat) Supe-

rior

infra octauam circiter ho-

ræ partem expe-

dict.

Finis primæ partis.



